

Tiada halangan stesen TV lain siar debat 1MDB, kata Salleh
Malaysian Insider
Nov 5, 2015
Oleh Nabihah Hamid

Menteri Komunikasi dan Multimedia Datuk Seri Salleh Said Keruak berkata, tidak ada halangan ke atas stesen televisyen lain sekiranya mereka berhasrat menyiarkan secara langsung debat mengenai 1Malaysia Development Berhad (1MDB) yang hangat diperkatakan ketika ini.

Beliau berkata demikian mengulas keputusan Pakatan Harapan hari ini yang menggantikan Ahli Parlimen Petaling Jaya Utara Tony Pua dengan Ahli Parlimen Pandan Rafizi Ramli untuk berdebat dengan Presiden 1MDB Arul Kanda Kandasamy.

"Tidak ada halangan jika stesen lain ingin menyiarkan (debat) secara langsung jika kedua-dua pihak bersetuju," katanya kepada The Malaysian Insider, sambil menambah Radio Televisyen Malaysia (RTM) tetap tidak akan menyiarkannya kerana tawaran mereka sebelum ini hanya terbuka kepada Pua dan Arul.

Semalam, Salleh yang juga pengarah komunikasi strategik Barisan Nasional berkata RTM tidak akan menyiarkan secara langsung debat 1MDB walaupun Pakatan Harapan mencari pengganti untuk Pua.

Katanya, tawaran awal hanya dibuat bagi Pua-Arul berdebat dan jika salah seorang daripadanya menarik diri bermakna tawaran itu terbatal serta merta.

Majlis Presiden Pakatan Harapan hari ini mengumumkan Rafizi yang juga setiausaha agung PKR akan menggantikan Pua yang juga setiausaha publisiti kebangsaan DAP dan ahli Jawatankuasa Kira-kira Wang Negara (PAC) Parlimen.

Gabungan parti pembangkang itu menggesa perdebatan disiarkan secara langsung di televisyen dalam program yang turut disertai penonton. – 5 November, 2015.

Copyright © 2015 Edge Insider Sdn Bhd

Source:

<http://www.themalaysianinsider.com/bahasa/article/tiada-halangan-stesen-tv-lain-siar-debat-1mdb-kata-salleh>